

# Unitad surveseivla

Spitex Selva, assistenza e tgira a casa giudem la Surselva

■ (anr/abc) Margis ha la suprastonza dall'uniun-purtadra da Spitex Selva envidau alla radunonza generala. Ella sala dalla casa-pervenda a Sagogn han il president Gion Albert Coray e la meinagestiun Anni Adam-Cahenzli rapportau d'in onn fetg intensiv. «Nus spitgavan da principi che la tendenza ensi cuntinueschi era il 2017. In tal augment da 20 pertschien dapli uras prestadas tier la clientella ha denton tuttina fatg surstar nus»: Aschia ha la meinagestiun Anni Adam-Cahenzli resumau la lavur prestada igl onn vargau. La Spitex Selva ei stada dumandada pli che zacu. Alla radunonza generala ha Anni Adam mussau cun graficas il resultat ed il surplus dad uras prestadas. Spitex Selva ha gidau e susteniu 191 clients e prestau per quels 14'761 uras, quei ein 2532 uras ni 20 pertschien dapli che 2016.

## «Nus vulein sedustar»

El rapport annual ch'ella ha presentau alla radunonza generala ha la meinagestiun era menziunau ch'il diember da visetas che las assistentas e tgirunzas han fatg tier lur clientella seigi s'augmentaus fermamein sin 22'253, quei munti ella media 60 visetas a gi. Avon tschun onns indicava la statistica dalla Spitex Selva aunc 35 visetas a gi, lu prestava ella agid ed assistenza a casa a 132 clients.

Aunc avon che la meinagestiun ha presentau las cefras ed ils resultats dalla part operativa ha il president dall'uniun Spitex Selva informau tgei che la part strategica ha fatg. Gion Albert Coray ha menziunau che la suprastonza hagi priu posiziun tier la revisiun parziala dalla lescha cantunala davart la tgira da malsaus. En quella eis ei previu che las regiuns da spitex dueien corrispunder allas regiuns da spital. Quei havess consequenzas fatalas per la Spitex Selva, per tgei lu vegness in menaschi che funcziuna, lavagaus e stratgias d'apart. Las vischnauncas da Flem e Trin vegnessen attribuidas engiu viers il Plaun, las quater autras Laax, Falera, Sagogn e Schluein ensi viers la Surselva. «Nus vulein sedustar cun tuttas pusseivladas che nossa unitad da spitex resta sco quei ch'ella ei», ha Gi-



Las dunnas dalla Spitex Selva ein engaschadas ellas vischnauncas Trin, Flem, Laax, Falera, Sagogn e Schluein.

MAD

on Albert Coray declarau. El ha rendiu attent all'opiniun dil schef dil departament da sanadad, cuss. gov. Christian Rathgeb. La suprastonza dalla Spitex Selva vul mantener sia structura cumprovada.

Ei sappi buca esser ch'ins separi in menaschi che funcziuni schi bein e che seigi optimaus en mintga detagl. La Spitex Selva secumprova dapi onns cun in territori e structuras surveseivlas sco era cull'organisaziun persunala che la clientella appreziescha. Els seigien s'entupai en quella caussa cullas autoritads dallas sis vischnauncas, lezzas attestien lur cumplein sustegn. Finamira dalla suprastonza dalla Spitex Selva e dallas suprastonzas communalas da Trin, Flem, Laax, Falera, Sagogn e Schluein eis ei che cusseglier guvernativ lubescha in'exceptiun, numnadamein in'organisaziun da spitex che lavura en dus territoris da spital, en Surselva e Plaun.

Sper quei quitaun strategic-politic actual ha la suprastonza dalla Spitex Selva

survigilau il menaschi operativ che ha funcziunau senza incaps. Il grond problem ch'ei sedaus duont igl onn ei la munconza da persunal, respectiv il grond augment da lavur ch'il persunal ha stuiu dumignar. Tuttas organisaziuns da spitex ein numnadamein confruntadas cun ina viulta ella sparta dils spitals. Per spargnar cuosts restan ils pazients adina pli cuort temps el spital. Anni Adam ha confirmau ch'ina persuna operada stuevi aunc avon paucs onns restar silmeins duas jannas el spital. Ils cass staziunars sereduceschan denton pli e pli. Ils pazients ston ni astgan bandunar il spital gia suenter paucs gis. Els vegnan tarmess a casa e confidai alla tgira ed assistenza dalla spitex.

## Pintga fluctuaziun

Per assister e tgirar la clientella a casa ein 29 collaboraturas stadas en acziun, da quei 10 tgirunzas diplomadas, 1 specialista da sanadad, 1 specialista da sanadad en emprendissadi, 1 tgirunza da ca-

sa, 10 assistentas da tgira e treis gidontras da tenercasa. Tuttas dunnas lavuran en temps parzial denter 15 e 70 pertschien. Vitier vegn il team ell'administraziun, per la direcziun lavuran treis persunas cun plazzas da 60 respectiv 75 pertschien sco era ina menadra da team cun 15 per-tschien. Puspei ha la meinagestiun Anni Adam constatau fetg pintgas fluctuaziuns enteifer la squadra. Igl onn vargau ha Immacolata Scolieri saviu festivar siu giubileum da survetsch da 25 onns, Rosmarie Arpagaus lavura dapi 20 onns tier la Spitex Selva, Anni Adam medemamein e Tresa Cathomen dapi diesch onns.

Il quen annual dalla Spitex Selva presenta cun in pign avanzament da 8'824 francs, quei tier expensas da 1'342'437 francs ed entradas da 1'361'261 francs. Deficits han las sis vischnauncas-purtadras buca stuiu curclar, ensemen han ellas pagau 260'938 francs, il cantun ha contribuui la summa da 318'149 francs.

Suenter la radunonza ha Corina Carr informau ils presents dall'organisaziun Tecum. Igl ei l'uniun-purtadra el Grischun che accompogna grevmalsaus e moribunds. Quella ei vegnida fundada igl onn 2000, quei onn haveva ella fatg 84 assistenzas. Igl onn 2017 han 95 persunas cumpetentas e habilitadas da Tecum stai 970 gadas en acziun egl entir Grischun. La meinagestiun Corina Carr ha informau che 10 umens e 92 dunnas hagian fatg ils cuors che autoriseschan els d'accompagnar moribunds e grevmalsaus. In da quels ei Edi Bonorand da Trin. El ei terapeut da tuns e porscha assistenza a moribunds. Igl um da 69 onns ha raquintau da sia experientschas e digl engaschi pretensius. Las persunas da Tecum ein cunzun la notg en acziun per assister a glied ch'ei sin murir. Ellas vegnan a casa privatas, ellas partizians palliativas da spitals e casas da tgira dil Grischun. Dapi sia fundaziun ha Tecum scolau 450 persunas sco accompignadras ed accompignaders da moribunds.